

ASO FARAILE, 19 FEPUARI 2021

Na nofoia e le Sui Fofoga Fetalai le Nofoa i le itula e 9:39 i le taeao e tusa ai ma le Tulafono Tumau 27(1).

Tatalo.

SUI FOFOGA FETALAI: Ou te faasilasila atu ua toe amatalia nei Taulumaga a le Fono Aoaofa Fautulafono.

E ia te au foi le ava ma le faaloalo e faatalofa ma faafeiloai i le paia maua o le Maota, i le afio mai o lau Afioga i le Taitai o le Malo, lau Afioga i le Palemia ma le Aiga Kapeneta. Malo foi le folau malo le soifua.

E faapea foi a outou Afioga i Minisita Lagolago, Taitaifono o Komiti Tumau a le Maota, sui usufono mamalu uma o le Palemene, ia, e ofo alofa ma faatalofa. Malo le soifua, malo foi le onosai.

E faapea foi ona faafeiloai i le faafofoga mai a le atunuu i lau silasila mai i le Fonotaga a lau Palemene, ia, matou ofo alofa ma faatalofa atu.

Le paia o le aufaigaluega totofi o faanonomanu aua se manuia o Samoa, malo galulue, malo faatoatoa i le feau ma le galuega. Ia, tapuai maia, o lea o le a alo lau Palemene e tusa o feau ma galuega ua valaauina ai i lenei taeao.

TUUIINA ATU O PEPA

Na tolaulauina e le Failautusi le faasologa o le Tuuina atu o Pepa e tusa ai ma Tulafono Tumau 49(2).

1. S.R.2020/2, Tulafono o Teuteuga o le Faavae 2020 – Faasilasilaga o le Amata Faamamaluina.
2. P.P.2020/2021 Nu.137, Lipoti Faaletausaga a le Matagaluega o Tupe 2019/2020.

TULAFONO TAU FAAOFI O LE FAATATAUINA O TUPE FAAOPOOPO (NU.1) 2020/2021 – felafolafoaiga faaaauu i luga o le faitauga faalua – Aso 23

SUI FOFOGA FETALAI: Ia, e tolopo Galuega a le Fono Aoaofa i le aso ananafi, ua maea ona saunoa manino le Afioga i le Palemia i lana folasaga.

O lea ua tofi foi le tamua aua le Aiga Kapeneta. Ia, ma ou te fiafia e tapa lau Afioga i le Minisita o le Matagaluega o Tina ma Tamaitai, Atinae o Nuu ma Afioga ma Agafesootai e te saunoa i lau lauga, ma talifuitau e tusa o mataupu na laga e sui usufono o le Palemene.

Afioga Hon TUITAMA TALALELEI TUITAMA (Minisita mo Tina ma Tamaitai, Atinae o Nuu ma Afioga ma Agafesootai): Lau Afioga i le Fofoga Fetalai, faafetai mo le taulaga molia, lea ua e le manu ua logo le vateatea, ua tu mai lagi le lagaali a Tamafaiga. O lo outou soifua ma so matou ola, e puleesea. Ae a le aso? A lea ua tu le vaga i le figota ua olioli livaliva. Ua le o mala a o manu alaga. Ua tatou sapi ai nei i lagitau ma tatou siva i maa o malie. Ia o le Atua pea o lo o i ai le viiga, le faamanu ma le faaneetaga e faavavau, faavavau lava.

Lau Afioga i le Fofoga Fetalai, faafetai mo le avanoa e tali atu ai i mataupu sa laga e sui usufono mamalu i a latou saunoaga i le Tala Faatata Faaopopo o le Tupe. Ma talu ai foi o le aso o le aso puupuu, e i ai le lagona, o le a leai se faauilavea i lenei aso. Sa seu le aliiseu ma lona soaseu i gauta o Aana, ona faapea atu lea o le aliiseu i lona soaseu, “Alu atu ia se i e tu ma vaai i Sasae, po o le a se mea e te iloa atu.” Ua alu le soaseu ua tu ma vaai, ua foi mai ma le tala ua faapea mai, “ua ou vaaia si ao laitiiti uliuli o lo o tu mai Sasae.” Ona faapea lea o le aliiseu, “O le fuifui lenei o lo o aau mai le vasa, ae alu i na toe vaai.” Ua alu le soaseu ua tu ma toe vaai ua foi mai ma le tala fai mai, “Ua atuumauga le fuifui.” Ona faapea lea o le aliiseu, “O lupe na sa vaoeseese a o lenei ua fuifui faatasi.”

Ua paia ma mamalu le mea nei, ua liligo le fogatia, ua pau le tuaau ma fuamalu o le Tuiatua. Ua tulili le tai ua taaligoligoa foi le gataifale, aua ua matalupe le seuga, ua matai’asa le tiuga. Ua mati’e tiasa, ua pue foi le galu fuliafa. A lea ua atoa le taeao, taeao usu o Fuluulalematoto, ua papae le fogatao a ua taoto ti’a i paga, ua mamalu ma maualuga le paega o tiasa i ulupagā, aua o lele ua epa ma papaaao sui usufono mamalu o le Palemene, o lupe na faia mai i le fuifui.

Afio lau Afioga i le Fofoga Fetalai, afio lau Afioga i le Palemia o le Malo Tutoatasi o Samoa, o le Taitai foi o le Maota, lau Afioga Tuilaepa, Auelua Fatialofa Neioti Aiono Galumalemana Dr. Sailele Malielegaoi. Afifio Afioga i Minisita o le Kapeneta, Minisita Lagolago ma sui usufono mamalu uma o le Palemene o lo o tauaofia nei.

E le laaloa sa matou faamatalaga, ona o lea tatou te faatasi ma poututoa o Matagaluega ma Faalapotopotoga a le Malo o lo o tua i ai le Malo i ana fuafuaga ma polokalame mo le atinaeina o le tatou atunuu. Afifio ia ma papaaao a outou Afioga i Taiulu ma Ofisa Sili o Pulega o Matagaluega ma Faalapotopotoga a lo tatou Malo.

Ae ou te le i laasia le pa i fualaga, tau ia ina ou faapai atu ma le agaga faaaloalo i le afio o lau Afioga i le Failautusi Aoao o le Fono Faitulafono

faapea tupu ma tamalii o le atunuu, saoa ma tamaitai o lo o tautuaina le Fono Aoa Fautulafono a Samoa.

E le faagaloina foi le tapuaiga a le tatou Tafatolu Fefaatauagai a lo tatou Faigamalo, i le afio o le Faamasino Sili, le Peresetene o le Faamasinoga o Fanua ma Suafa, afioga i Faamasino ma le mamalu o le Faamasinoga.

E le galo Afia i si ona vao i le faafofoga tapuai mai o lau Afioga i Le Ao Mamalu o le tatou Malo, lau Afioga Tuimalealiifano Sualauvi II ma lau Masiofo, lau Afioga i le Sui o le Fono a Sui Tofia, lau Afioga Le Mamea Ropati Mualia ma lou faletua.

Afifio foi le paia maualuga o Samoa, le paia i Aiga, o Aiga o Tupu, Aiga o Ee, Aiga o Papa ma Aiga na Tafaifa. O Aiga ma latou Tama, o Tama ma Aiga, Tumua ma Pule, Ituau ma Alataua, Aiga i le Tai ma le Vaa o Fonoti.

E faapai atu foi ma le agaga faaaloalo i le tapuaiga a le aufaigaluega paia a le Atua i so o se fatafaitaulaga i totonu o si o tatou atunuu.

E goto le fetu o leapai pe a galo ia te au le mulivaieli o lo o ou tu ai. E fia faaaogaina ai lenei avanoa e faatalofa atu ai i si ou itumalo o Aana Alofi Nu.1, o si ou nuu pele o Faleasiu. I le afifio o le paia i Aiga, Aiga Sa Tuala, Aiga o Mavaega, o le Aiga Taulagi, Alo o Tuiaana Tamaalelagi, le afio o le Tamaaitu ma le Maugafa, afio foi Galumalemana o le Aloalii ma le mamalu i le Faletolu ma Fuaifale.

Ou te faatalofa atu foi i ou tama ma ou tina faaleagaga i so o se fatafaitaulaga i totonu o lo matou itumalo i Faleasiu. Aouliuli ia sau se taimi ona ou toe afe atu lea aua se upu ma se tala e faigata la outou tapuaiga mamalu, ae tapuai maia ae se i liuliualo le lupe aua so tatou sao i le Fonousu a le Palemene o Samoa.

Lau Afioga i le Fofoga Fetalai, avea ia lenei taimi e molimoli atu ai faamaisega ma faamafanafanaga i le faletua ma lona alo tamaitai, faapea aiga na lua o le Afioga i le sui usufono o Vaafusuaga Toleafoa Ken Poutoa ona o mafutaga motusia faafuasei ona o le valaau paia a le Atua. O le Afioga i le sui usufono ia Vaafusuaga, o se Tamalii sa galue foi ma auaunaga i totonu o lenei Matagaluega o Tina ma Tamaitai, Atinae o Afioaga ma Agafesootai e ala i le tofi o le Sui o le Nu mo lona afioaga o Faleaseela i tausaga ua mavae, ma faasolo mai ai seia oo ina avea ma sui usufono o lona itumalo. O le ata manino ma faailoga ia o se tagata galue ma tauivi ma le finau mo le manuia o lona afioaga. O le upu a le Tusi, “Amuia lea auauna ua valaau Lona Matai a o lo o faapea ona fai.” Tatou lototetele pea o lo o soifua lo tatou Matai Sili, o Ia lava e maua ai lo tatou filemu ma le malosi i taimi e tulai mai ai ma lutia ai le tatou folauga i fita ma peau vale o le soifuaga.

E fia faaleoina foi le faamaisega ma le faamafanafanaga i le uso a sui usufono ia Lealailepule Rimoni ona o le mafutaga motusia ma le Tina e ala i le valaau paia a le Atua. Ia agalelei pea le Atua i lau Afioga o le sui usufono

mautinoa o le Nofoaiga a le Palemene Lona XVII faapea lou faletua, le fanau ma le aiga faanoanoa.

Lau Afioga i le Fofoga Fetalai, e le tele ni saunoaga na afea ai lenei Matagaluega. O se molimau maumaututu foi lea o le faamalieina o sui usufono mamalu o le Palemene i galuega ma se taumafaiga vaivai a lenei Matagaluega o lo o faatino aua se manuia o nai o tatou tagata i nuu, alaafaga ma afioaga o lo tatou atunuu.

Lau Afioga i le Fofoga Fetalai, e 5 lava Tulafono o lo o faafoe ai lenei Matagaluega. 1. Tulafono Matagaluega o Mataupu tau Tina ma Tamaitai 1990 - Ministry of Women Affairs Act 1990. O le toatele o le tatou atunuu, e latou te le o atoatoa lo latou silafia i lenei Matagaluega ma matafaioi faatino. E tasi lava le gagana o lea e faaleo ai lenei Matagaluega, Matagaluega o Tina ma Tamaitai. A o le faaupuga sao, Matagaluega o Mataupu tau Tina ma Tamaitai, ae le faapitoa na o Tina ma Tamaitai. O lona faamaoniga. Tulafono lona 2 o lo o faafoe ai lenei Matagaluega, Mataupu tau i le Lotoifale 1995 – Internal Affairs Act 1995. 3. Tulafono o Fono a Nuu 1990 – Village Fono Act 1990. 4. Tulafono o le Saogalemu o Aiga – Family Safety Act 2013. 5. Tulafono Faatonutonu o Mea Faa-Anamua – Samoa and Dignitaries Ordinance, lea e afua mai ai le matafaioi o lo o tauave e lenei Matagaluega i le lalagaina o le ie Samoa. Ma lona 6, o lo o faagasolo i le taimi nei le tapenaina o le Tulafono mo le Tausiga ma le Puipuiga o Fanau a Samoa i le maea ai lea ona pasia e le Kapeneta lona faiga faavae i le tausaga na tea nei, Child Care and Protection Bill, lea sa ou taua muamua.

Lau Afioga i le Fofoga Fetalai, ia o lea ua faafofoga le mamalu o lenei Maota faapea foi e o lo o faafogafoga mai o le atunuu, e aofia atoa le atunuu i galuega fai a lenei Matagaluega. E le gata i tina ma tamaitai, o le fonu a alii ma faipule, o le lotoifale o le tatou atunuu, o le saogalemu o aiga, o lea ua oo lava i fanau. Lea e i ai le Tulafono lea na ou tolaulauina atu, o se taimi ona oo mai lea i le Palemene pe a maea ona silasila i ai le Kapeneta. Ua aofia le atunuu atoa i ona vaega eseese.

O faiga faavae. E ui i le tele o luitau sa feagai ma le Matagaluega i le faatinoga o ana galuega sa faataoto aemaise o tausaga e 2 ua tuanai atu, ae sa taumafai lava ina ia faatino nisi o faiga faavae e limataitaiina ai le faatinoga o nisi o matafaioi taua a le Matagaluega, e pei la ona i ai faiga faavae nei. 1. Faiga Faavae mo le Tausiga ma le Puipuiga o Fanau a Samoa 2020 – National Child Care and Protection Policy 2020. Ua maea ona faamaonia e le Kapeneta i le tausaga na tea nei, e pei ona ou taua muamua ina ua laga mai lenei mataupu. O lo o galulue ai le Loia Sili ma lona Ofisa i le Tulafono Tau Faaofi, e i ai lenei faiga faavae. Ma o le a tuuina atu i le Kapeneta mo sona faamaoniga mo le tuuina mai i le Palemene mo le pasia ma faamaonia ai e avea ma Tulafono.

O se vaega o lenei Tulafono Tau Faaofi, o lo o tagofia ai le mataupu e pei ona saunoa i ai le sui usufono mamalu mo Palauli i Sasae, le mataupu i alo

o lo tatou atunuu o lo o faatau savali oloa i luga o alatetele ma totonu o le taulaga. A pasia le Tulafono Tau Faaofi i se taimi lata mai, o le a faamutaina ai loa ma le toe faatagaina ai lea tulaga e faatino e a tatou fanau mai le 16 tausaga agai i lalo le matutua. Ae peitai, o le Kapeneta lava ma le Palemene pe a oo mai lenei Tulafono Tau Faaofi mo le faamaoniga, o le a i ai le faaiuga mo lea mataupu.

O lona 2, o Faiga Faavae o Taiala ia mo Polokalame Faale-Aoaoga mo le Fuafuaga mo Avanoa Faigaluega mo i latou e i ai Aafiaga Tumau o le Soifua – Training and Employment Action Plan for Persons with Disability. Ua maea tapenaina ma ua agavaa foi lea Faiga Faavae mo le faaogaina.

3. Faiga Faavae mo Avanoa Tutusa – Gender Equality Policy 2020. Ua lata ina maea ma o le a tuuina atu i le Komiti o Faiga Faavae a le Malo mo le iloiloga ae le i tuuina atu i le Kapeneta mo lona faamaoniga.

4. Taiala mo Atinae tau Tamaoiga i Nuu ma Afioaga – Local Economic Development Framework. Lea faatoa maea ona tuufaatasia ma o le a avea ma alafua mo le tuufaatasia o le Faiga Faavae.

5. Faiga Faavae mo le Tafiese o Sauaga i totonu o Aiga – Ending Violence Policy. Ua maea ona faamaonia e le Komiti o Faiga Faavae mo le tuuina atu i le Kapeneta lea taumafaiga.

6. Faiga Faavae mo Pulega e Aofia ai Tagata uma i Nuu ma Afioaga – Community Inclusive Governance Policy.

7. Ua maea foi ona tuuina atu le Lipoti a Samoa i le Faalapotopotoga o Malo Afaatasi i le 2018, i le tulaga o lo o taoto ai le faatinoga o le feagaiga mo le tafiese o so o se faiga faailoga lanu e faasaga i Tina ma Tamaitai – Convention on the Elimination of all Forms of Discrimination Against Women and Girls.

Ma le vaega lona 8, ua maea ona tuuina mai i le Palemene Lipoti Faaletausaga a le Matagaluega, Annual Reports e oo mai i le tausaga faaletupe seia tuana'i atu nei.

Lau Afioga i le Fofoga Fetalai, ona ou oo mai lea i Faiga Faava-o-Malo, lea foi sa taua i totonu o lenei Maota. O le tatou Matagaluega o lo o taimua i faatinoga o galuega e lagolago ai i manaomiaga o feagaiga faava-o-Malo, ua avea ai Samoa ma sui auai e pei o le feagaiga mo le tafiese o sauaga e faasaga i tina ma tamaitai. E po o lea na ou taua, o le convention on the elimination of discrimination against women, pe ua faapuupuuna o le CEDAW. O le feagaiga mo le puipuiga o faamanuiaga faavae faatagata soifua o fanau, convention on the right of the child. Ma le feagaiga mo le puipui o aia tataua a i latou e i ai aafiaga tumau o le soifua, convention on the right of persons with disability. E tele polokalame faale-aoaoga ua faatino, o le mafuaaga ina ia faaititia le popolevale ma le le mautonu, pe afai ae oo mai ia lenei faamai. E tele polokalame faale-aoaoga ua faatino mo tina ma tamaitai, faapea foi i latou e i ai aafiaga tumau o le soifua. O lo o uunaina foi atinae o pisinisi laiti mo tupulaga talavou, e le o maua ni galuega. E

faapea foi i aiga e maaleale le tulaga o lo o soifua ai. E faapea foi i latou e i ai aafiaga tumau o le soifua. O lo o faaauau foi le intensive program, e pei ona lagolagoina e le Faalapotopotoga a Malo Afaatasi, ina ia maua ai foi avanoa e nisi tupulaga talavou e saili ai ni a latou galuega.

Lau Afioga i le Fofoga Fetalai, o sina oototoga o galuega faatino ma faamoemoega o lenei Matagaluega. Ou muamua atu i le taiala, ona o lea foi sa ou talanoa i ai i se taimi ua fano i lenei foi Fonotaga, ina ua laga mai e nisi o sui usufono. O taiala mo le atinae o itumalo, o le District Development Planning Program, DDP pe a faapuupuu. Ua maea ona folasia i le Maota le agaga moni o le faamoemoega, na maafaaafuagalua ai lenei taumafaiga, ona o le naunautaiga a lo tatou Malo. Ina ia afua mai i le faatofalaiga a itumalo uma o Samoa, atinae ua latou talitonuina, e aoga mo le manuia auiluma o lo latou itumalo. Ona tuu atu lea o le tauau, o le tatou Matagaluega e fai ma sui o le Malo, i auala e faatino ai ia atinae. E tele tele le aoga o lenei polokalame, o lea foi sa lagona lava i totonu o le Maota le faamalo ma faafetai a nisi o sui usufono. Ona o le fesoasoani tele o lenei Matagaluega i le faatinoina o lea faamoemoe. O silafia foi e i latou o lo o fai ma sui o lo tatou Malo, i fonotaga i atunuu e mamao, aemaise lava Faalapotopotoga nei o lo o fai paaga po o donor partners, a lo tatou atunuu. E i ai le WHO, UNO, UNICEF, ILO, ma Faalapotopotoga uma o lo o aumai seleni i totonu e atinae ai Samoa, e talanoaina le tulaga lea i le tele o Fonotaga. O le a se faiga e sili ona mautu ma lelei, mo atunuu o lea e aumai ai seleni nei. Aua o le tele o nisi o Faalapotopotoga nei. E le gata ina aumai seleni, ae e tau mai foi e latou po o le a le mea e faaoga i ai le seleni lea. Ma o mai ai ma o latou tagata e faatino le mea lena. O le fesili la, e faafefea ona...e talia e e o lo o avatu i ai nei fesoasoani nei gaioiga ma nei atinae o le a fai? Pe tuu mai i le atunuu e pule i latou ma le faaogaina, i mea ua lagona ma talitonu e tatau ona faamuamua? O lea foi la ua mulimulitai ai le tatou Matagaluega, i le agaga lea. O lea e faa-Peretaniaina e isi, o le ownership and belonging. E o atu le Matagaluega faaali, tuu atu i itumalo, filifili outou, o le a la outou faatofalaiga, o le a le mea e tatau ona ave i ai le faamuamua. Ia o le mea lena o le a fesoasoani atu le Matagaluega e faatino, ina ia tusa ma lo outou manao. O le aoga lea, a maea ona faatino lea faamoemoega, ona i ai lea o le lagona i tagata, o lea ua faia i ai lenei atinae, o matou e ona le mea lenei. O le onaina, belonging, owning, ownership, o matou e ona, e le o se mea na sau se isi fai mo matou. E leai o matou lava na mananao e fai. O le a lelei foi ona vaaia, lelei ona tausia, talia ma le faafetai. Aua e i ai le upu foi lele e faapea. "A ave, ave le upega, ae aua le ave le ia, a tagi mai le ia, aua le ave le ia ae ave le upega." Aua a avatu le ia ua faaoga uma, ona toe alu foi lea e sue se isi ia, e aisi e toe sue mai se isi ia. Ae a ave i ai le upega, ona faasino i ai ma le faaogaina o le upega, ona ai ia ai lava lea seia oo ina masae le upega. Ae a masae foi ua iloa fono. E pei la o le tulaga lena, o lea e taumafai i ai le tatou Matagaluega e ave ma sui o le Malo, ia i ai le agaga i o tatou itumalo.

E faasino i ai auala ma faufautua, ae fai lava e latou ia le tonu, ma fai e latou le faaiuga, o le mea lea matou te mananao i ai e faaaoga i ai le tupe lena na aumai. O lea la e o le Matagaluega, ave manaoga nei o itumalo, ia tatou paaga ia o lo o i ai seleni. Ona filifili mai lea e latou atinae po o project, poloketi, e fiafia i latou e lagolago ma aumai ai tupe e faatino ai. Ae fai lava e tatou lava tagata, e fai lava e o tatou itumalo, faatasi ma le lagolago a le tatou Matagaluega.

O lea sa lavea i nisi o saunoaga le galuega tele sa faatino, e ala i le tuufaatasia o taiala a itumalo, o lea ua maea le laasaga muamua. E pei ona sa galulue faatasi ai le Matagaluega, i le paia maualuga i taitai o nuu ma itumalo. E faapea le mamalu i faafeagaiga ma faletua ma tausii, saoa ma tamaitai. O le malosi o le nuu, o le itumalo, le tupulaga talavou seia oo lava ia tatou fanau. Ua maea ona faalauiloa aloaia taiala mo itumalo e 49. Ae seivagana ai le itumalo e tasi, o lo o i Salafai, o lo o taumafai pea e tuufaatasia le latou taiala. O le taiala, o atinae a itumalo o lo o faailoa ai i totonu vaega ma atinae ua tasi moemoe i ai finagalo o le itumalo. O le a ave, o le a ave i ai la latou faamuamua mo le manuia o tagata o le itumalo. I so o se vaega o le soifuaga i lena foi vaitau. Ua maea ona faatino polokalame faale-aoaoga mo itumalo e 17, i ituaiga faamai ma faafitauli faasoifua maloloina. E aafia ai le soifua o tina ma tamaitai.

SUIFOFOGA FETALAI: E faamalulu atu i le sui usufono o lo o saunoa, se i tuu atu le avanoa e tulai mai ai le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: A o le i see ese le saunoaga a le Afioga i le Minisita o lo o gafa ma atinae ia i nuu ma itumalo, sa ia taua le itumalo e tasi i Salafai, o lo o taumafai pea i ai le Matagaluega. A o lea ou te manatua, ou te faafesili ai, pe le o le itumalo lena o Palauli le Falefa lea sa teena maia le savali lea, lea ua matua faamanino le agaga atoa o fesoasoani ia mai fafo. O le upu lava lea o le ownership, o lona uiga e i ai i totonu o le atinae le sao o le itumalo. I le talitonuga, afai e i ai le sao o le itumalo, o lona uiga, o fesoasoani o le a aumai, e i ai foi le agaga o le a sagisagi mai le itumalo e fai. Ona o i tonu lava, o lea ua agai tonu mai lava i le atinae e manao latou e fai. Ae le o se mea ua faamalosia. O le vaega lua lea sa ou maua atu, i le maea ai o le faatalanoaga lea ma le itumalo, ona ave loa lea o le polokalame lea, tou te o e saili mai se fesoasoani mai fafo. Ma o le fesoasoani foi lena, e tilotilo lelei i ai le paaga o le a aumai le fesoasoani, ia atagia ai o se atinae e loloto lona faatauaina e le itumalo lava ia. O le a fua mai ni fua lelei e manuia ai tagata lautele, o atinae e pei o gaoioiga, o mea toto ma isi atinae eseese e fai i totonu o le itumalo. E fua mai ma manuia ai fanau a itumalo. Ou te fia malamalama, se i e toe faalautele mai lava le pito lea, ina ia aua ne i nunu le toau. O uiga ia, o uiga na o atu le Malo e

faamalosia, a o se faamalamalama, ina ia atiae le itumalo, i luga o faamatalaga e malamalama lelei. Mo le aoga o le itumalo, ia faapea foi tupulaga fai mai. Se i toe faamaape mai lava le itu lea, ona e manaia le agaga. Ae pei o lo o i ai sina faanunununu ona o faaupuga o lo o ua suia atoa ai se mea lelei, e foliga o se mea leaga. Se i toe faamaape mai lava le mea lea.

SUI FOFOGA FETALAI: Ou te tapa lau Afioga i le Minisita o le Matagaluega o Tina ma Tamaitai Atinae o Nuu ma Afioga ma Agafesootai e saunoa.

Afioga Hon TUITAMA TALALELEI TUITAMA: Faafetai i le Afioga i le Taitai o le Malo. E fiafia foi e faamanino atili lea mataupu. Aua e tasi lenei taumafaiga a lenei Matagaluega, e ese le maualuga o lona faatauaina i a matou galuega o lo o faatino nei. Ona ua matou tilotilo atu ma molimauina le aoga o lenei taumafaiga mo le tele o itumalo, lea ua faataunuu ai. E pei foi ona molimau mai le Afioga i le Taitaifono i lana saunoaga, e faafetaia foi, ona o lea ua manuia ai foi lona itumalo, i le polokalame lava lea o taiala mo itumalo. A o le agaga moni lava lea, e pei ona ou taumafai e faamatala atu, aua ne i i ai le lagona i o tatou itumalo. O lea ua o atu le Malo e faamalosi ona fai ni fuafuaga i totonu o le latou itumalo, ae le i malilie i ai. Pe latou te le o manaomia. O lea la ua tuu atu la ia latou, fai mai la e outou po o le a le mea e sili ona lelei mo outou. I lea foi tulaga, ia manatua foi, e pei lava ona ou taumafai e faamalamalama atu. A sau se tagata mai fafo sau i le tou nuu, sau faapea, vaai outou fai le mea lea e lelei mo outou. O lea o le a matou o mai e fai ona faaoga lea e outou. Ae le o i ai le agaga o i latou o lo o faia i ai lenei mea. Ona faapea lea, ua lelei, oso ae loa le manatu, faaoga tupe, faaoga le seleni lea ua aumai e fai ai le mea lea e o mai ai latou. Ia faapea ni a tatou tupe, o mai loa fafo, fai se atinae tele, uma toe o, ae ia o ifo laia e faaoga. Ae uma ane, ona e le i i ai se lagona o i latou lea e fai i ai nei mea. E leai ma se faatauaina ia i latou. Ae iu foi ina le faaogaina, aua foi e le o se latou filifiliga, e le o se latou priority le atinae lea ua fai. O lea la ua manatu le Matagaluega, o le a sui le auala e fai ai mea ia. Ina ia ave ia latou e aumai e latou po o a tonu lava mea ia e mananao ai. O nisi o manaoga o itumalo ia ua aumai i le Matagaluega, e fai lava si maualuluga ma le taugata. O le mea foi lea a o faafofoga mai itumalo, o nisi o manaoga e fai sina maoae o seleni e faatino ai. E le faapea ua taleaina pe le o taliaina, o lea ua faamaumau uma. A o lo o tufa nei, o lea e oo atu i ai lau faamatalaga, ia tatou paaga, o Saina, Ausetalia, Iapani ua tufa i ai.

O lea la e faatali, e le faapea foi lele e pei o tatou, a e manao i se mea, e te alu lava fai i si ou uso, se i aumai lava si na au \$100 lena se i fai ai si mea sia. Ona e alu atu lava lea, tope tope uma. E leai, o atunuu ia, e i ai auala e fai ai. E i ai auala, e i ai manaoga e tatau ona faatumu, e tatau ona faamalieina. Aua foi e tusitusia uma mea uma, a ave foi, e tatau foi ona

aumai ni lisiti. E faafefea le faaaogaina o le tupe lea, na sao lelei le faaaogaina o le tupe lea. Ia ona augofie foi lea, a toe tagi atu, ioe ave, lelei tele, o i latou ia e faaaoga sao tupe ma faaaoga tatau seleni ia e avatu i ai. E le o faia i se auala faapiopio, o la e avatu lava ma ave sao e faaaoga i le mea lea na tatou mananao ai.

E pei o le lagona lena ina ia uma ane le atinae, o faatino i totonu o itumalo, ona faapea ane lea o i latou o tatou e ana. O lo tatou sao i lenei mea, o le tausia faalelei ma ia fua mai le aoga o nei taumafaiga, lea ua alu ai ia tupe. Aua e pe aumai lava e Iapani pe aumai e Ausetalia, pe aumai i Saina. E ui uma mai lava i le Malo, a le seanoa ia paaga va lelei ma lo tatou Malo, e le aumaia ni seleni. O lona uiga i le faaiuga o nei mea uma, o seleni a le Malo. O lea e auala mai ona o le Malo, ma ona o Faigamalo lelei, ma pulega lelei. E pei o se faamalamalamaga lea ma se faalautelega o le vaega lea lau Afioga.

SUI FOFOGA FETALAI: Se i toe tuu atu le avanoa i le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E taua tele le itu lea, aemaise lava le itu lea ua saunoa i ai le Minisita, i mea nei o fesoasoani e aumai i fafo. Ona e ala ona auala mai, e auala mai i le Malo ma feutagaiga o maliega e aumai e fesoasoani mai i le Malo. E le o faapea o lava seleni e faatino uma ai. Mo sina faataitaiga, e faapena foi i mea nei o faleaoga, o faleaoga ia e faatupe mai e Iapani. O faleaoga ia e faatupe mai e Iapani, o le faiga faavae lava ia a le Malo, e talosagaina le Malo o Iapani e fetuutuunai le latou seleni e aumai i le JICA. A fai lava la e na o le \$300,000 le tupe e aumai e faatino ai le faleaoga e na o le \$300,000 lava. E taumafai lava la le nuu, ia uma ai lava i le \$100,000, e tele lava le mau faiga e fai ai. O le isi faiga e fai ai, fai le fogafale tasi, e uma lelei ai lava, fua lelei e uma lelei le faleaoga. Ae a fai loa le fogafale lua, o lona uiga, o le a tele le mea o le a goto i i i le faavae, ona o le faigata. E tatau ona malosi le faavae pe a oo i le taimi e lulu mai ai le mafuie, e aua nei pau. Ae o lea e tele le eleele e mafai ai ona fai le fogafale tasi, e malosi, e le soona tele ai le tupe e goto i i, i le faavae, ae le uma le faleaoga.

O le faiga faavae a le Malo, afai lava la e faatupe mai e le Malo o Iapani, ae tou te manao e fai se faiga ina ia sili ai, o le faiga faavae lava lea, o le sao lena a le nuu. E le toe o mai i le Malo, aua foi o le tupe lava lea mai Iapani, o le tupe lava lena a le Malo lea ua faatino ai. O le mea e tatau ona fai, fai le sao o le nuu, pe o loa e fai se latou loan e faauma ai. E pei o le faleaoga o Fagalii, e \$300,000+ na avatu i i, ae na oo i le \$500,000, ona o lava lea o latou e faatumu mai le vaega lea, aua o le latou lava lea manaoga. E faapea foi i fale uma lava ia e fai e Iapani, e pei foi o lou nuu o Aufaga, e faapena foi le mea na tupu. Ae mafai lava ona fai i le seleni lea o lo o i ai, pe a fuafua lelei. O lea ua manino lau faaaliga.

Ae o le mea lona lua, o lea e taua, ona o le tapenaga lava lea a lau Matagaluega, o lea e tapena ai nuu mo mea ia ma alu le savali i tua. E le gata la o lau Matagaluega, e i ai foi Matagaluega na o atu, fai a latou polokalame mo le puipuiga. E le gata i le puipuiga o le siosiomaga o laau ma manu, ae tuu ae ai se manatu o lea e o mai, ma mea o mea pueata e fua ai le fanua i uta ma ave i Saina. O se tulaga tau faasese, o lea la ona o lau Matagaluega o lea e i ai sui o le nuu po o pulenuu. E ese lava la le pulenuu tamaloa mo fonotaga ma pulega faale-nuu lea e masani ona fai. Ae ua ese foi le fonu a pulenuu tina, po o tamaitai lea ua sui le igoa, ua le o toe taua o pulenuu, ae ua faaoga le upu lena e pule sese ai, ua alu faasauai sei tulou, ia le tagata lea ua tuu i ai le pule. E faatatau i galuega, lea e faatonutonu atu e lau Matagaluega. O le tagata faigaluega a le Malo, o le tagata o lea e totogi alauni, e le ni tamai alauni lea e totogi. O lona uiga, e fuafua le latou galuega i faatonuga ia e alu atu i le tou Matagaluega. Afai la o lea ua faataoto atu se polokalame faapea, ae o atu e le malamalama le itumalo ma tutuli mai le aufaigaluega. O le a la le faaiuga a outou, e fai i ituaiga tulaga ia? Ua le mafai ona ave ia le fesoasoani lea, talu ai o ni talitonuga sese, a o lea e nofo le sui o le Malo. O le a le faiga faavae o le sui o le Malo lea e fai lona alauni ma auai i fonu a le tou Matagaluega, ma logo atu i faiga faavae? O faiga faavae e manuia ai le nuu ma le itumalo. Ae alu atu ae faaletonu, o le a le faiga a outou? Ia manatua, o le pulenuu, o le sooupu, ae sese loa le mea e fai e le pulenuu, afaina uma lava le nuu atoa. O lea e faalagolago i fesoasoani ia o lo o avatu. O le a la outou faiga faavae o lo o fai i ai, i ituaiga sui e le faamaoni faapenei?

SUI FOFOGA FETALAI: Ia malie lau Afioga i le Minisita, se i tulai mai le sui usufono mo Aiga le Tai. Pe i ai se mea o... o fia fesili i le lauga autu a le Minisita, pe o fia fesili i le faauilavea a le Taitai o le Maota.

Susuga Mulipola Leiataua Laki (Aiga i le Tai): O le lauga autu... o le tatou Tulafono Tumau lau Afioga e agai lava i le lauga e pei ona saunoa le Afioga i le Minisita.

SUI FOFOGA FETALAI: E agai tonu lava i le mataupu lea ua oo i ai.

Susuga Mulipola Leiataua Laki: Lau Afioga ua leva lava ona fia faaopoopo i le saunoaga a le Afioga i le Minisita i nai vaega e fia faalauilei ai le saunoaga matagofie, e le fia faalavelaveina.

Lau Afioga e tasi lenei o itumalo na taimua i le toa-sefulu pito i luga sa muamua faatino le tulaga i a tatou taiala ia o le itumalo. O le agaga lea e ala ai ona fia tulai, leaga e matua talisapaia e le itumalo lenei ia faiga faavae e pei ona faataoto atu e le tatou Faigamalo, e ala i le Matagaluega o Tina ma Tamaitai. E momoli ai le agaga faafetai i le Afioga i le Minisita ma le Pulega,

ona o nei faiga. Ma o le mea moni lau Afioga e pei ona saunoa le Afioga i le Minisita, e ese le taua o taiala nei e pei ona faataatia atu.

O le vaega muamua e fia faamanino, o le tulaga i le tuufaatasia o le tama o le itumalo, i le faipule, faatasi ma pulenuu ma sui tamaitai o le itumalo. E ese le taua o le faiga lea, ua mafai ona galulue feoeoeai ai le sui usufono, o sui tamaitai ma pulenuu o afioaga uma o le itumalo. O i lea ua fausia ai se faiga maopoopo e galulue faatasi ai. Aua o le tele o taimi i le tofi faipule, e matua manaomia lava le lagolago mai o le itumalo. Ae peitai e i ai lava faiga a isi nuu, e taumafai ai e vavae lava, ona o tulaga i ni faaiuga o palota sa tulai mai. E uma lava la le Paeaiga, o la e feua'i lava tua o faipule ma pulenuu, ma sui tamaitai o isi nuu. A o le faiga faavae lea e pei ona faataatia e le Matagaluega lau Afioga i le Fofoga Fetalai, ua matua maopoopo ai se faiga lelei i totonu o le itumalo. Ma ou te molimau atu, aua sa taimua i le faiga faavae lea e ala i le taiala e pei ona faataatia e le tatou Matagaluega. Ou te iloa o le itumalo lenei na sili ona vave na launch le matou taiala. E 2 lava vaiaso, ae tatala le matou taiala, o le matua maofa lava. Ma ua tele foi galuega lelei ua faatino e le taiala lea. E le gata i le tele o semina sa mafai ona faatupe atu e le Matagaluega. Ou te manatua se tasi o semina mo nai vaega foi lea o ma'i i aafiaga tumau. E ese le taua o nei aoaoga, sa faatupe atu i totonu o le taiala lea. Ma o i foi sa maua ai foi le avanoa e fesoasoani ai le sui usufono i nai isi pulenuu ma isi sui tamaitai. Ia, aua o le toatele pei lava foi ona tau avatu lava le fautuaga a le tatou Malo, ia tofi mai lava i latou e agavaa mo tofiga ia.

Aua o le isi lea mea o lea e tupu, e na ona alu atu lava o le isi sui tamaitai ma le isi pulenuu, ia nofonofa ai lava ma taamilomilo ai lava i le tofi lea, ae le o malamalama i ona tiute ma ana matafaioi e tataua ona faatino aua le faaleleia o totonu o le nuu ma le faaleleia o totonu o le itumalo.

O le ala la o le tulai lau Afioga, ona ua faatino foi le faleaoga o lenei nuu e ala foi i le taiala lea, le taiala lea. E 8 potu sa faamaonia atu e le tatou paaga ia Iapani, ae 11 potu na fausia o le faleaoga lea, ia faatasi ma faleui. O le sao lea o le nuu, ae ou te faafetaia lenei nuu ona ua maua se tofi, na fai lava e le tofi potu faaopoopo ia e 3 ma le faleletaua, ia ae leai se sao o le nuu. Ioe. Ou te iloa o le a misia le Vaega Faaupufai ma le tofi lea e tautala pe a oo ina tulai mai le isi faiga palota. Ae faafetai atu lava i se tasi o tamalii o lo o tauva i le tofi lea, lea matou te aifilofilo i totonu o le Komiti lea. Ioe. O lea la e malamalama le sui usufono lea i faiga faavae na te faaauauina le faiga lea pe a maea le tatou faiga palota i le lumanai.

Ia, pei o le ala lea lau Afioga i le Fofoga Fetalai, e le itiiti ai le agaga o le faafetai e ala i le saunoaga matagofie a le Afioga i le Minisita, ia leaga o lo o manuia ai lenei itumalo ma lenei nuu. Ia manuia le Fonousu.

SUI FOFOGA FETALAI: O le ala lea o le tuu atu o le avanoa i lau Afioga i le sui usufono mamalu mo Aiga i le Tai, o lea e molimau e le

Failautusi o le Maota, tasi lea o sui usufono e finau lava i le mea lea. E ese lona faataua o le DDP lea, ma o fuafuaga alualumamao lea a le Malo, lea la e Taitaifono ai le sui usufono. E le gata foi i i, ae ou te faalogo e te talanoa lava i mea e ao ona faatino. O le mea lea e momoli ai le faamalo ma le faafetai i lau Afioga, e ui lava o lea ua faasee-tuagalua, ae manatua pea e le Maota lenei lou sao. O le ala lea o lou fai atu, e saolele lava le saunoaga. Ioe. I le faatauaina o le galulue faatasi o sui usufono, tofi filifilia o itumalo ma sui tamaitai ma sui o le nuu i afioaga taitasi o itumalo. E ese le taua o lou sao, ioe. E te uunaia lava le tulaga o le atinae o le itumalo.

O le mea lea, ia i ai pea le agalelei o le Atua. Ua maea ona saunoa le Maota i lau Afioga, ae o lea lava e te saunoa lava e uunai le faamoemoega lelei o le Malo mo ona tagata. O le mea la lea, ia, faafetai tele.

Se i tuu atu le avanoa e tulai mai ai le sui usufono mo Faleata Sisifo.

Tofa Lealailepule Rimoni Aiafi (Faleata Sisifo): Faafetai i lau Afioga mo le avanoa. Ou te talitonu o lea foi le... se i toe tali lelei le Afioga i le Minisita pe a foi mai i le tatou malologa. Ae taua tele le vaega lea ua oo i ai le saunoaga a le Afioga i le Minisita ona o le fatu atoa o Samoa le Matagaluega lenei, le fatu atoa lea. O le mea lea sa sau ai tatou i le amataga o lea ou te talitonu i ai, a o atu mea foi ia o faatalanoaga i tua i nuu ma itumalo, e pei e eueu ese le sui usufono, fai mai e le tataua ona aia le sui usufono i mea nei i te i ua faapolokiki mea. A o le vaega taua la lea ua taumafai i ai le tatou Matagaluega. O le centre atoa foi o itumalo, o le sui usufono e tataua ona i ai.

O le isi vaega, o mea ia o vaegatupe ia mai fafo, lea e tele ina o sao i isi faalapotopotoga o i ai aumai ai le funding. I lou talitonuga, lea pei ona ou taua i lau faamatalaga, o le central agency a le Malo, o le Matagaluega o Tina ma Tamaitai. E faa-lua ona ou alu e fai au tautalaga i le mafutaga foi lea a tina lea e fia tauva i le palota, lea e fund sao mai lava i fafo mea nei. Ou te le o malamalama la, aua i lou talitonuga, o le Matagaluega a Tina ma Tamaitai, e tataua ona lotolotoi ai i mea nei, aemaise foi la itumalo ia e i ai lou itumalo lea e tele i ai tina foi lea e le fai nuu. Aua o le isi lenei vaega tele lea ua faaluafesasi ai le tele o mea, e ese le mafutaga a tina, ese le Komiti Tumama, e oo i le mea fou lea e sau nei o le mafutaga a tina nofo tane ea po o le a ea. O se mea le lelei ma le manaia lenei mea. E tataua ona tagai lelei i ai le tatou Matagaluega i le vaega lea, a o le tele o suiga ia ua i ai. E moni, e faafetai i le Afioga i le Minisita. Maumau e, maumau e pe a na mafai lava ona e toe nofo i se tausaga e tasi. Ia, paga lea, o le a e afio ae tuu mai lou mafaufau atoa matou te faafesagai. A o nai vaega ia lau Afioga leaga e taua tele, e ese le taua o le Matagaluega lenei. Faafetai lava i lau Afioga i le Minisita, aemaise lau Minisita Lagolago, le sui usufono mo Faleata Nu.1, e toe foi mai foi ia. Ma le faaloalo lava.

SUI FOFOGA FETALAI: Faafetai mo le saunoaga a le sui usufono mo Faleata Sisifo. E ese le taua o lou sao, leaga e faapena le mea o lo o tatou nonofo ai i Faleata.

Se i tuu atu... malie lau Afioga i le Minisita mo Tina ma Tamaitai, se i tuu atu lava le avanoa i le Afioga i le Minisita mo Galuega, Felauaiga ma Atinae Eeseese.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eeseese): Faafetai i lau Afioga i le Fofoga Fetalai mo le avanoa. E puupuu lava se faafesili i se mea e fia famalamalama mai le Afioga i le Minisita, ona o le tulaga lea ua talanoa ai i pulenuu ma sui tamaitai. Po o le a se faiga faavae ona o lea ua molimauina foi aemaise foi... e i ai pulenuu o isi afioaga ma sui tamaitai, o la ua pei ua campaign i le isi vaega foi lele a le FAST a o lea e galulue i le Faigamalo a le HRPP. E fia malamalama la po o le a se faiga faavae i ituaiga tulaga ia ua aliae mai, leaga o lea e totogi foi e le Malo.

Ia, na o le pau lea o se fesili faamolemole. Faafetai.

SUI FOFOGA FETALAI: Ia faafetai. Se i tuu atu lava le avanoa i le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, sa ou manatu e le tatau ona faia lea fesili ona o le tulaga lava ia i le tofiga, e tofi le tagata lelei, ma e mulimulitai e fai faatonuga ia e avatu. O le tulaga lena ia gaoioi, gaoioi le tagata e tusa ai o faatonuga ia e avatu mo le lelei. Ae le mafai ona aveesea le talitonuga o le tagata ia, lona talitonuga po o fea le Pati e alu ai, leaga e tofi lava le tagata ia ma lona ia talitonuga. Ae pau lava le mea e faataua e le Malo, o le tagata e alu e faatino taiala uma o lea e avatu. Ae ou te malamalama i le fesili, ona e talu ai o ni talitonuga e ese ai, e ono pio ai e le faia mea ia, o i ina la e sausau ai loa le pelu. Ae le sausau le pelu ona o talitonuga faa-polokiki. O le tulaga lena, e i ai lava le talitonuga, o lea foi e oo i faifeau. E i ai lava faifeau ua tuu le mea sa tatau ona ia faia o le laugaina o Afioga a le Atua ia ola ai tagata uma, po o fea lava le Pati e alu i ai. A o le tulaga lea, aua ne i aliali le mea o le Political Party, o ana ia lava na mea e fai faalilolilo i tua, i le talitonuga e tasi i le taitaiga o le Malo, e le tatau ona aafia fua mea tau polokiki. Ia fai lava le galuega e tusa o faatonuga na avatu mo le manuia lautele o le nuu. Po o fea lava le mea e agai i ai, po o le a le lotu po o le a le ituaiga talitonuga faa-polokiki, e fai le mea amitonu. O le amitonu lena e faamasino ai oe. Faamasino e ai? Faamasino e le Atua. Leaga e leai se mea e lilo. O lea la, afai o oe po o fea le tulaga tofi e te i ai, po o oe foi o le faifeau, o lea e faamasino oe i taimi uma e tusa o le tiute na tofia i ai oe e le Atua. O i la i faiga faale-Malo, o

mea ia, e le aiaina e le Malo le Pati e alu i ai le pulenuu. Na pau lava le mea e faamasino ai, o e mulimuli e fai faatonuga ia na avatu e manuia ai le lautele o le nuu, ae le faapitoa i se vaega.

Lau Afioga i le Fofoga Fetalai, e faamalie atu i le Minisita, o lea ua ou talia le vaega lea.

SUI FOFOGA FETALAI: Ou te manatu o lea ua... ae malie sui usufono o lo o tulai mai, e i ai le talitonuga e tatau lava ona tatou o i tatou faiga faavae i tualumaga o le tatou Fono.

Talu ai o lea ua maea ona tali le fesili e le Afioga i le Taitai o le Maota, ma ua tatou taunuu foi i le tatou malologa masani.

O lea ou te faasilasila atu ai, ua faataatiaese nei Galuega a le Fono Aoao Faitulafono mo lana malologa masani o lenei taeao.

Na faataatiaese Tualumaga a le Fono Aoao Faitulafono mo lana malologa masani i le itula e 10:50 i le taeao ma toe faaauau i le itula e 11:20 i le taeao.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.

SUI FOFOGA FETALAI: Ou te faasilasila atu ua toe amatalia nei Tualumaga o le Fono Aoao Faitulafono.

E i ai le talitonuga ua maua foi se faasiliga malosi i le paia maualuga o sui usufono o le Palemene i tapenaga foi a le Afioga i le Failautusi ma le Ofisa o le Fono. E momoli ai le faamalo ma le faafetai, malo le agalelei aua le tausiga o le Fono.

E avea foi lenei avanoa e fai ai lou leo e faafeiloai ma faatalofa i le maualuga o le Maota, o lea ua matau atu i le afio mai o lau afioga i le faletua o le Afioga i le Minisita o lo o saunoa le Afioga ia Tuitama Talalelei ma le nofo a alo. Ua sii mai lava le fala siisiigata ona o le tapuaiga o le lauga mulimuli a le Tama o le aiga. O le mea la lea, ia, matou te faapea atu, malo le soifua, malo le galulue, ua manuia faiva o le Toeaina, o lea ua malolo manumalo i le galuega ona o ou faiva alofilima ma le fanau. Faamalo le Atua i la outou tapuaiga. E ese le manaia o le tapuaiga a tina. Faafetai.

Ia, a o le i faaauauina le faagasologa o le tatou Fonotaga, ou te tapa ma le faaaloalo lau Afioga i le Taitai o le Maota i nisi o mataupu e fia saunoa faamanino aua le faafofoga a le atunuu ma le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e momoli atu le faamalo, o lea ua sao i alo le faaaloalo a le Matagaluega, sa tatou malolo puupuu ai mo le faafouina o le malosi faaauau aua le tatou Fonousu.

Ou te manatu e i ai si vaega puupuu lea e tatau ona ou toe oo i ai, ona e i ai faiga faavae faava-o-Malo e eseese ai lea pulega Malo ma lea pulega Malo. O le Malo lea o tatou, o lo o mulimulitui i faiga faavae a le faatinoga o pulega Malo a le Taupulega, Commonwealth Parliamentary System, lea la na mulimuli ai lava tatou. O le Parliamentary System, e fesui ai Malo ae tumau pea le aufaigaluega, i luga o le talitonuga e le taitaiseseina le aufaigaluega i ni faiga faapolokiki. E tasi lava le mea e vaai i ai, faaoga lo latou tomai ma galuega fai i le tautuaina o le Malo. O lona uiga, e fesui ai Malo ae tumau pea le public servants, tumau pea le aufaigaluega. O le ala foi la lena i le vaaiga a le Taitai o le Malo ma le Kapeneta, o latou uma o lo o tautuaina le Malo, e leai ni o latou uiga, manatu faapito. E matua tuu i le atoatoa a latou taleni e tautua ai le Malo o lea o lo o tu. Ma e o tutusa lelei le talitonuga lenei ma le talitonuga faa-Kerisiano, lea e aumai e le Tusi Paia. O le a le Malo e tu, o le Malo lena e ave i ai le loyalty, e ave i ai le lagolago. Aisea? Leaga o talitonuga ia faa-Kerisiano, o le Malo ua tu o le Malo na tofia e le Atua. Ma e tele aoaoga lelei a lo tatou Alii lea e afua ai le talitonuga lea, lea la e mulimulitai i ai Faigamalo faa-Taupulega. E fesuisui ai Malo fesuisui ai Pati Faaupufai, ae tumau pea le public servants, e tumau pea le public servants. Po o ai lava le Malo e sau, o ai le Palemia ma le Kapeneta e sau, e tautua ma le faamaoni latou. O le ala lena e ala ai ona faatulaga Tulafono, Tulafono malolosi e puipuia ai le tutoatasi o le aufaigaluega a le Malo. O lea foi la e ala ai ona faatulaga o latou tiute, e eseese lava tofiga, e lipoti sao lava i le Palemene. O tofiga e tai pei o le Suetusi Sili. O le tofiga e pei o le Komesina o Sulufaiga. E lipoti sao mai lava iinei i le Palemene, ona o le talitonuga maumaututu lena. O le mea lea e taua tele ai le mea lea ina ia malamalama i ai le Palemene lenei. E le mafai ona auaoa le vaai i le tautua e fai e le tagata faigaluega a le Malo i le Malo o lo o tu. E ese ai la ma le Faigamalo faa-Amerika. E eseese mamao a mea ia. O le Faigamalo faa-Amerika, e sau lava le Peresetene ma le Pati ma aumai a latou tagata. A uma atu foi la le Faigamalo ua o ese, ona alu ese atu foi lea o le Peresetene ma aveese uma atu latou tagata. E tele lava la le eseese o faiga faavae ia. A outou matau, e alualu lelei, sologa lelei Faigamalo a Taupulega, leaga o lea e i ai tagata o lo o i ai le poto masani, o lo o faaauau pea, po o ai lava le Faigamalo e sau, e faaauau pea. A o i la i Amerika, o le ala lena o lea tou te vaai atu nei i le vevesi, aua e sau loa lea Peresetene ma lea Vaega aumai uma loa tagata fou e le lava le poto masani. O lea foi la tou te vaavaai atu i ai, e le umi lava ae talepe atu lea feagaiga faava-o-Malo, talepe atu lea feagaiga faava-o-Malo aemaise lava le nofoaiga lea faatoa uma atu nei. O le a la le mea ua tupu?

Ua tifato i lalo le faaaloalo na ave e Malo tetele i le Malo o Amerika, ona o le mea lea o le fesuisuia o le aufaigaluega a le Malo e tusa ai o latou Faigamalo. O le ala lea na tulai mai ai le fesili lea sa tulai mai a o le i malolo, o lea e faavae i talitonuga ia faa-pulega Malo faa-Amerika e i ai pulega faapena. A o tatou ia, o lea e sosolo lava i luga o pulega faa-Malo o le Taupulega. Ma e taua tele le itu lea, e sosolo i luga o le faamaoni. E vaai la le Kapeneta ma le Malo i le faamaoni o le tagata i le faatinoga ma le atoatoa o le faaaoaga o le tomai, ae le faataua le tulaga o lana political affiliation. Aisea? E leaga o le aia tataua lenei a le tagata lava ia. O lana aia tataua lenei. Na pau lava le mea e faamasino ai e le Kapeneta le tagata faigaluega a le Malo, o lana tautua i le faamaoni i ona tiute. Na ona sipa lava fai loa ma le faaiuga.

E i ai le tusa ma le 18 tausaga talu ai, na sau ai se tasi o le aufaigaluega ia te au e Pule Lua, le taimi lea... e outspoken lava le tama o lo o i totonu o le Itu Agai i le Malo. Sa sau la ia te au e fia malamalama, o au o le Minisita o le PSC, pe faamata e i ai sona avanoa e avea ai ma Pule o se Matagaluega, ona o lona tama lea e fai lava sina mamafa o lafoga mai ia te au ma le Kapeneta. O lau tali, e leai lava ma se mea faapena. Na pau lava le vaai, o e faamaoni i lau galuega? Ae faapefea lou tomai? Na pau lava na o mea e mulimulitai i ai au ma le Kapeneta, o le taiala lenei a le Malo faa-HRPP, e faaaoaga lelei fanau aoina a Samoa sa auina atu ai i fafo, toe foi mai ma le taleni. E le aumaia polokiki a le tama e fai ai le galuega. Na o le pau lava lea o le mea e tilotilo i ai, o le galuega po o lelei ona fai, ae po o faamaoni foi. Ia, ona alu ai lea, ae te i ua avanoa le tulaga ae le i talosaga mai. O la e ou te vaai pea i ai i le tagata faigaluega lea ua i tua, o lo o faaauau pea le tomai ma tautua ai le atunuu. Ae o le mea sili ona taua, ua malamalama i faiga faavae a le Vaega lenei, e le o alu le Malo o Samoa i faiga faa-Amerika, o lea e alu i faiga faavae faapitoa lava mo pulega Malo e pulea faa-Palemene.

Lau Afioga i le Fofoga Fetalai, o le auau lenei o lau faamatalaga lea na avatu ae tatou te le i malolo, leaga o le mea lenei, o le natura lenei o le masalosalo, tatou te masalosalo. Ia ae i ai foi le upu a le atunuu, "E le asa le masalo."

Lau Afioga i le Fofoga Fetalai, e taua tele le itu lea i le faafogafoga mai foi a le tatou atunuu, aemaise i latou ia o lo o galulue i i faa-auauna tautua i le Malo i le tulaga o pulenuu. E leaga o pulenuu, o latou ia o lea e fai feiloaiga ma tautau atu i ai fuafuaga mamao a le Malo. O le pulenuu po o sui o le Malo tane ma sui o le Malo tamaitai, o latou na e tataua ona o i tua faa-fono tina i le tulaga o tina, faa-fono tama i le tulaga o tama ma folafola i ai faamanino fuafuaga mamao a le Malo mo le manuia o le nuu ma le itumalo. Ae le na ona o atu nofonofono.

O lea sa saunoa le tasi o sui usufono, e taua tele mea nei o tofiga e fai i tatou nuu, ia tofi mai tagata e faamaoni, ae le o le tofi mai o le loomatua ona o le faletua o le alii sili, po o le tofi mai o le alii sili ua le mafai ona alu i uta, ona sau e nofonofono ai i i ma ao le alauni. O le alauni lea e mana oi ai ae le o

faia le galuega. O lea la a o atu le aufaigaluega a le Malo e faatino ana polokalame mo le manuia au i luma o le nuu, e faigofie lava i ina ona sao ai le tagata pepelo. Ona alu loa lea o le faasalalauga, o lea e o mai ma... o la e ua o atu i uta e fua le eleele e ave ma Saina. E leai ni eleele na o atu ai le aufaigaluega e fua mo le isi itumalo lea, o lea na o atu e mataitu le siosiomaga o manulele aua latou faamaumauga. O mea ia e taua tele, ona e le pitotasi le vaaiga a le Matagaluega o le Siosiomaga i se vaega, o lo o vaai lautele. E i ai le aoga o laau, e i ai le aoga o manulele na fai e le Atua ina ia selau pasene le tatou siosiomaga e tatou te ola fiafia ai. O le tulaga lena, afai la e le o faia e le sui o le Malo, o le ala lena lea sa ou fesili ai, po o le a la le isi mea e tatau ona fai.

O le tulaga la lea sa ou tulai atu ai e faasao, e i ai foi mea e tutupu. O mea e tutupu, o lea ua taoto le principle, le taiala, le taiala e faaaoga ai e le Malo ma faataua le taleni nai lo le political affiliation, nai lo le talitonuga faa-polokiki. Ae peitai, i le natura o mea, e malosi loa lou politica affiliation ma lou talitonuina o le isi Vaega Faaupufai, o le mea e fua ai le amiotonu, o lou faamavae, e le tau faamutā. E pei lava o le sailiga o le amiotonu e fai e Faamasino. Afai o le a fai le Faamasinoga a o la e te iloa o lea e te aafia ai, faamavae. Lau Afioga i le Fofoga Fetalai, o le uiga lena o lau upu na fai atu ananafi, a sau loa le faatonuga mai luga i le Kapeneta ae manatu le Ofisa Sili o Pulega e le fiafia i ai, o le fua o le amiotonu ma le faamaoni, faamavae, faamavae. E le tatau ona e nofonofo ai pea i totonu o le Matagaluega ma e faifaima leaga ai ma taofia ai le gaoioiga e tatau ona fai. O le natura la o mea, e malosi loa le talitonuga o le tagata faigaluega i se isi Faigamalo, i se isi Pati ae le faamaoni le faiga o lana galuega o lea e galue, o le fofo o le mea lena i lou lava loto fuatiaifo, faamavae. Aisea le mea e tatau ai ona e faamavae? Aua a e nofonofo ai i i, e te le faia se mea lelei, ona o lea o le a e taumafai, o le a le mea lelei e fai atu e le Malo, e te le faia, ina ia tauleagaina ai le Malo, ae le o le Malo, o oe lea e te faapogai ai. Afai la se iuga i i po o le Ofisa Sili o Pulega o le Matagaluega ona o le matuia o ni ana mea na fai, po o le pulenuu, e le faia ona o le tulaga faa-polokiki, ae fai ua le faatinoina ou tiute, ua e le faamaoni. O le tulaga sao lena o le Faamasinoga o le amiotonu, ma o lea e taumafai le Vaega lenei e taitai mai pea i totonu o le ala aga ia ma le faatinoga o galuega a le Malo. E taofia ai le fevesiai, taofia ai le fetuiai, ma sologa lelei ai galuega a le tatou Malo. O se matati'a e faigata, e le faigofie. Aua e ogatasi lava mea ia e lua, e taoto lelei mea ia e lua, e uso, e uso, e aiga. E ese loa lau talitonuga faa-polokiki, e lē faamaoni loa. Ae a faamuta i i lou tofiga, e le faamuta ona o lou talitonuga faa-polokiki, ae faamuta ua e le faamaoni.

O le ala lena lea sa ou vave tulai atu ai ina ia faataoto le taiala, o le taiala lena o lea e limataitaiina ai le Malo lenei. E faapena foi isi tofiga. Po o oe o le faifeau, o lou faamaoni i lou tofiga mai le Atua e talai le talalelei, na o le talalelei, o lau tautoga lena na fai i luma o le Atua. Ae a i ai lava ni ou

talitonuga faa-polokiki, o le mea la lena a oe, o lau aia tataU, ae aua le faamatilatila tele. E te fealuai lava i tua ma fai i ai, nai lo lou faamatilatila, o la e faamasino mai le aulotu. O le a faapefea la pe afai o la e mulimuli le aulotu i Afioga a le Atua, lagolago le Faigamalo o lo o tu? O le a la le mea e tupu? E le o se mea e iloa ai se mea o se auauna a le Atua o lo o faaoga tatau le taleni ma le tiute na avatu e le Atua ia te oe. I lou tu matilatila mai luga o le pulelaa, ma e lauga mai ai, aemaise o le nuu lea e faafogafoga atu, o le aulotu. O le nuu o tapaaui, o ponaoo o e faiupu lea na osi le tou feagaiga. O oe o le faifeau o le feagaiga taulagi a le nuu. E pau lava le mea e te tu ai, o Afioga a le Atua, aua te see mai i i. E te see mai loa i i, ua e talepe le feagaiga paia. E le aia mai o i le pulega a nuu, e le aia atu foi le nuu i le folafolaina o Afioga a le Atua, e taiala ia i tatou uma.

Lau Afioga i le Fofoga Fetalai, e manino lava le aumaiga o Tulafono a le Alii. E manino, e 10, a o le Tulafono Sili e tasi, o le alofa, e na o le tasi lava le Tulafono o le alofa. Ae aisea na toe faaopoopo i ai le isi 9? Na ala ona toe faaopoopo i ai le isi 9 ona o le tatou loto maaa. Sa faaoga ai i le upu lea o le alofa, o le gagana lena a le Atua, ona tautino loa lea o upu. O lea e taai i totonu pe tau i totonu o le alofa, tautino loa le upu. Aua e te gaoui. Aua e te molimau pepelo. Aua e te faaleaga tagata. Na matua tautino mai lava. O le a la le mea na ala ai ona le fia faalogo i ai le Au Faresaio? E leaga o upu tautino, upu tautino, o lea e aafia uma ai latou. Ae a na aumai na o le alofa, e fai uma lava mea sese uma lava. Ae fai le alofa, mo le vaaiga a le tagata, vaaiga a le tagata, ae faagalogalo uma isi mea. O le ala la lena, ina ua faamanino e le Alii i upu tautino, feita ai loa ma le au falesaio, aisea? Ona o upu tautino ia ua tau atu, o lea e aafia uma ai lava latou. E ita ai le loto. O le ala lena o lea na naunau ai le au falesaio e vave faaoo le oti ia Iesu, leaga o lea e tautino mai e le Atua i upu tautino. O le ala foi la lena, a ou talanoa, ou te faaogaina le gagana manino, upu tautino, ae ita ai isi, ita ai isi fai mai o lou le mafaufau. A fai e ita, aua le faalogo fua, aua le faalogo fua i ai, ae tape a latou leitio.

Lau Afioga i le Fofoga Fetalai, o le tulaga lena ia manino lelei le mea lea, ma ou te faafetai i le Afioga i le Minisita o Galuega, ua na laga le mataupu lea, e taua tele. Ina ia manino i totonu o le Maota lena le aumai o le faafesili, ina ia faamanino ai, o lea la ua ou tu atu e faamanino. Sa ou manatu e le tatau ona laga, leaga o mea ia e i ai le upu foi lele. E seasea se agelu ona laasia le vaega lea, ona e i ai lava le manatu foi lea, se a tatou tautino loa mea ia ua tatou le faaaloalo. Ae ua tatou le faaaloalo, o le gagana faaaloalo lena o lea e tele ina sao ai le anoano o mea piopio ma lalafi ai le au solitulafono, lalafi ai i mea ia, ma faapea mai. Oi ua le faaaloalo, ua le faaaloalo upu, a o le tagata e manao ina ia malamalama e o lo o ave i ai le feau. Ia faaoga le gagana faigofie, faaoga le gagana talanoa, faaoga le gagana e malamalama ai le 10 tausaga, le 20 tausaga, le 30 tausaga e le masani ona saofai i totonu o fonu a matai. Ma faalogo ai loa i upu maotua ia, upu faaaloalo. O le tele o

solitulafono ia e fai nei, ona o lea e faalafi i tua o gagana faaaloalo e le malamalama ai nisi. A o le taitai lava ia, i totonu o le Maota lenei, e manao ia manino tagata i le feau lea e avatu, ave i le gagana, le auala e malamalama ai. E toatele a tatou failauga, e faia le mea lena o le ave i le gagana faalafi. Aisea? E matamuli te i faapea toeiina, sole leaga le tagata e le mafaufau. A o le tutu i le malaela ma molimoli le agaga malamalama, e malamalama ai lo tatou atunuu. Ma o le taua lena o le finagalo lea na faaalua e le Minisita o Galuega, ina ia maua ai le avanoa, e faalautele ai le mataupu lea. E le tatau ona faapena se Faigamalo i lalo o Faigamalo faale-taupulega. E faataua i le Malo le faamaoni, le tomai e faavae ai faaiuga.

Lau Afioga i le Fofoga Fetalai, ou te manatu ua manino lea vaega.

SUI FOFOGA FETALAI: Ua faamalo saunoa i lau Afioga i le Taitai o le Malo, ua faafofoga le Palemene ma Samoa i le faamaninoina o tulaga uma. E leitioa foi le folasaga o le polakalame a le 2AP ma le Palemia. O la e manino ai lava upu, i le gagana tuusao. Ia oo lava i le tamaititi ia malamalama i mea o lona atunuu, mataupu o lo o faamanino e le Afioga i le Palemia. O le mea la lea, o le saunoaga i lenei vaega o le tatou Fonotaga, faafetai tele. E tutupu matagi i liu o vaa i tulaga o le faamaninoina o mea uma. Ma ua oo lava i le Nofoa, ia tailo lava i se sui usufono, ae ua manino auofala i mea uma. O le mea lea, e momoli ai le faamalo ma le faafetai i tulaga uma e pei ona saunoa i ai lau Afioga i le Taitai o le Malo.

O lo o taumafai mai le Minisita o Galuega tetele a le Malo, e manatu e tuu atu le avanoa i lau Afioga.

Susuga Hon Papaliitele Niko Lee Hang: E faafetai tele i lau Afioga i le Fofoga Fetalai mo le avanoa. E tulai atu ma le agaga faaaloalo e molimauina le saunoaga matagofie a le Afioga i le Palemia. Ona o a na mau sa faafesili i le fesili lea, ma ua manino atoa, 100% le faamatalaina o le tulaga lea. E pau lava le mea sa ou tau lagalaga ai le tulaga lea, e pei foi ona saunoa le Palemia, o le tulaga foi lea ua matuai atagia lava faiga ia e fai, ua matuai aliali lava. O lau la popolega, ona o lea foi e molimauina mai e nisi faipule, ua oo lava i pulenuu o latou o galulue ma faipule ia e taumafai mai e faapalasi le Malo. E pei o le tulaga lena, ae ua manino foi auofala, ma o le tulaga lava lea e pei ona saunoa i ai le Palemia, o le aia tatau a le tagata ia. Ae pei o le popolega ona o tagata ia o lea e faigaluega i lalo o le Malo. Sa tatau pea la aua ne i faaaliali le latou galuega ia e faasagatau mai i le Malo, ma taumafai e faatoilalo le Malo. Ae tatau ona mafaufau o le Malo lea e maua ai a latou galuega. Ma tau faamaoni i le faatinoga o latou galuega. O le tulaga lena, ae faafetai i lau Afioga i le Palemia, o lea ua manino auofala, ua 101% faafetai.

SUI FOFOGA FETALAI: Ia faafetai i le finagalo faatamalii i lau Afioga i le Minisita o Galuega tetele a le Malo. e le toe oo se tala a le Nofoa i tulaga

ua uma ona fai atu foi so matou vaivaiga. O lea lava ua manino le mata o le vai i le gaepu sa i ai, o lea la ua poto atoa i le saunoaga a le Taitai o le Malo le Afioga i le Palemia. Ua ou manatu, o le a faasee ese le mataupu lea. Ae lelei ona tuu atu le avanoa i lau Afioga i le Minisita.

Se i tulai mai le sui usufono mo Faasaleleaga Nu 2.

Tofa Namulauulu Sami Leota (Faasaleleaga Nu 2): Faafetai mo le avanoa, meamanu e le i toe see le Afioga i le Minisita e faaauau lana saunoaga matagofie. Ae meamanu lea ua tatou i ai i le mataupu lea o le taiala. E matagofie le saunoaga a le Minisita, faafetai Tuitama mo galuega. E tasi lenei Matagaluega, e galulue soosoo tauau ma matou nei. E faafetai mo le avanoa e faatulai ai taiala nei, e tusa ai foi ma le avanoa ua tuuina mai ia matou o sui usufono e galulue ai sui o nuu ma sui pulenuu. Ae o le isi foi naunautaiga, o lea ua tuuina mai taiala, o le fautuaga foi a le Ofisa ua tuuina mai ia te i matou e lau Afioga i le Minisita ma le Matagaluega. Aua o lo o ua utiuti foi tatou seleni, o lo o agai atu le faatinoina o matou talosaga agai atu i nisi o Matagaluega ma Faalapotopotoga tumaoti. E fesoasoani i le faatinoga o taiala ia ua tuuina mai.

Ae i ai la le tulaga lea e fia malamalama i ai lou nei sui usufono lau Afioga i le Minisita. Ona e i ai nisi o Faalapotopotoga ua tuuina mai a latou fesoasoani, taumafai e faataunuu ai nisi o manaoga lea e i totonu o taiala. E pei o le tulaga lea o le tausia o le soifua maloloina. Ua aumai le latou fesoasoani e faatino ai, ae paga lea, ua i ai foi la matou poloketi ua maea ona tuuina mai ai fesoasoani nei, e pei o le faalauleleia o vaitaele a nuu. E faafetai aua o lea sa tatou galulue faatasi ai ma nuu ma sui o nuu faapena le matou itumalo. Ae ua laga mai foi, o lea e faafofoga mai le Afioga i le Minisita o Soifua Maloloina. E pei ua aumai le tusi malosia a le Ofisa o le Soifua Maloloina ia taofia ai fesoasoani ia. Ona o tulaga faapea ua feteenai ma ni malilie faava-o-Malo ma nisi o Faalapotopotoga nei.

O le agaga moni lava ia, faafetai ua maua atu, e 5 a matou togalaau sa faatino mo fualaau e tausii ai le soifua maloloina, na maua atu ai le fesoasoani. E 2 poloketi o vaitaele ua taofi i le taimi lenei, ona ua taofi atu e le Soifua Maloloina. E na ona talosaga atu ai i lau Afioga, pe mafai ona fesootei ma le Ofisa o le Soifua Maloloina, i se vaega e fetuutuunai ai, ia faataga atu Faalapotopotoga ia e fesoasoani atu ia matou. O la ua leva ona sauni e fesoasoani atu, ae pei o lo o i ai le vala lea o lo o taofia ai fesoasoani ia e tuuina atu ona e faapea o lo o feteenai ma faasalalauga, i lalo o malilie faava-o-Malo, i le Tobacco Control Act a lo tatou Malo.

Ma lou faaaloalo faafetai.

SUI FOFOGA FETALAI: Ia se i saunoa le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O mataupu lautetele o mea tau policy. E tasi lea o mataupu e i ai pea le tulaga o lo o taumafai foi lo tatou Malo. O le ala tonu lava lea o lea e fai ai fonotaga a le Cabinet Development Committee. O lea e tulai mai ai nai feeseeseaiga. E le o ni mea matuia, ona e i ai la le tulaga lea, o le drive, po o le taumafaiga lea e taofiofi le itu lea o le ula tapaa. Ona o le toatele o tagata ua gasegase ai. O lea la e alu le latou taumafaiga i le tulaga lea o le taumafai e taofiofi le ula tapaa. Na oo mai le faasea lea ia te au, ona o uiga foi ia e alu le faasea, ae kopi mai au, o au o le Taitai o le Malo. Ona ave lea o lau tuualalo, aua o le mea e tatau ona fai i mea faapenei. E i ai taimi ou te valaau uma ai latou nei, o Minisita, ma Ofisa Sili o Pulega o Matagaluega, ona matou talanoa lea. Ona e i ai lava le taimi e alu ai lava le Matagaluega ia, ae le o le mea lena e tatau ona fai. A tupu loa se mea, felogonai Minisita ona feiloai lea, saili se fofo o feeseeseaiga o taofi leaga e i ai le taimi o la e vaai pito tasi le Matagaluega i le latou Tulafono, ae o la foi e vaai pito tasi le isi Matagaluega i latou foi Tulafono ma latou atinae o lo o fai.

O le mataupu la lea na alu atu ai le fesoasoani a le fale tapaa, ae faalavea ane ai le Matagaluega o Falemai, na ave ai lau tuualalo i le Minisita ma le Matagaluega e sese le tou mea lena e fai. O la outou vaai pumoomoo i la outou matafaioi ae ua outou le vaai i le isi itu i galuega lelei lea e fai e le fale tapaa.

O le fale tapaa, o lea ua o tatou iloa uma lava, e pei foi o le falepia. E fiu lava e taofi tagata e taumafa tapaa, e taumafa tapaa lava latou. E faapena foi i le faleava, e fiu lava e taofiofi, ae taumafa ava lava tagata e taumafa ava aua o le latou lea aia tatau. O le latou lea aga ma le latou tu masani e fialia i ai. E pau lava le itu leaga ona o le alu ai o tupe ae le faaaoga fanau ona o mai foi lea i le Malo e sue atu ni tupe ua uma ona ula tapaa ai uma na inupia ai le tama, aua o le tama lava e masani ai i ia mea.

Ia o lau la fautuaga i ai, e leai se mea o le a outou taofia ai fua le fesoasoani a le fale tapaa, ma o le tele lava o fesoasoani o le lelei foi lena. E le faapea o le a ave ona ula tapaa ai lea o tagata, ae pei o la e vaai pumoomoo latou i le latou foi matafaioi o le a avatu nei le mea o le a atili ula tapaa ai tagata. O le ituaiga mea faapenei, e faaaoga i ai le common sense. Ia o le tele o tagata aaoaina e leai ni common sense. O le tulaga la e i ai isi tagata 10 faailoga e vaai atu o le a tau gau le taupega i le tele o faailoga, ae tasi lava le mea la e misi, leai se common sense.

O le tulaga la lena e tatau ona fai. Aua le taofia fua. O le mea foi o le fale tapaa, faaalu pea le fale tapaa latou. Fai pea le latou fale tapaa aua e i ai lava tagata e ula tapaa. Ae o le mea la lea e taua, e o latou e faapea foi isi Matagaluega. E o fai latou fonotaga ma Minisita e pei la o le mea lea na ou taua ananafi e o fai le Minisita o Aoga i aso ia, i aso la. A faaletonu maka o tamaiti, ia upgrade loa i luga. E tiga ona sau le Mathematics e faaletonu, ae

tau fai upgrade uma i luga. E tau faamanaia ai o latou maka, ae na ua nana le faaletonu lea e i ai. O le faaletonu lea e i ai e le o lava faiaoga.

Ma o le mea lena e tataua ona agai i ai le Ofisa Sili o Pulega ma le Minisita i lena taimi e fofo le mea, o le fatu lea o le fofo, o le fai o le uunai ia lava faiaoga. Ae o lea faatoa tulai mai i le taimi na tulai atu ai Mauiliu ia aga a isi Minisita na muamua atu ma isi Pule. O lona uiga sa le agai tele i ai latou mafaufau i i ae o lea la ua fanau tonu mai lava i le taimi lea o Magele, ia liliu atu loa Magele ma si faafafine lea sa Ofisa Sili o Pulega o atu loa fai le fofo o le fofo la lena o lea ua fofo ai le mataupu lea.

Lau Afioga i le Fofoga Fetalai, e ala ona taua le mataupu lea, e i ai mea faapena e tutupu mai a... Ia afai nei e taumafai e tape pe loa le tatou fale tapaa alalaga le Soifua Maloloina, ona a lea? E taofia ai la le aumai o tapaa? E sau pea le tapaa. Ia ae o le a sau mai Niu Sila ma Ausetalia o lea e leotelele taofi le tapaa, ma isi atunuu o le lalolagi taofi le tapaa, ona o ai lea o tatou taofi le tapaa ae o la e faaalu latou pisinisi tapaa. Ona a lea? Ona sau lava lea o latou tapaa ula e tatou ma tele ai lava galuega a latou ae a faafefea la ia tagata lea na faigaluega i i? Ua leai ni galuega. O le mea la lea, o le faiga o mea o fuafuaga faava-o-Malo, faaoga le mafaufau.

E te alu i o... manatua na i ai le tagata o lea e le o nofo mai i i na laga le mataupu lea ia Israelu, ma le tatou palota, na ou tu atu ai lea o Malo uma lava o le lalolagi, e tasi lava le mea e ave i ai le faamuamua, o lana national interest. E tasi lava le mea e ave i ai le... e te saofai loa i totonu o le Malo Afaatasi ma le saofaiga, o le mea muamua ia e vaai i ai, o le manuia o lou atunuu. Afai loa ua secure, ua faamalieina le Tulafono lena, ona amata loa lea ona e tilotilo atu lea e lagolago nai isi au paaga i mea e manao ai, ae o le faamuamua o le atunuu ia, o le mea e manuia ai le atunuu.

O lona uiga la, po o fea e sau ai le fesoasoani, pe sau mai i Saina, pe sau mai i Initia, pe sau mai i Lusita, talia. Aisea? E tasi lava le gagana e fai e tatou, o outou, ma a outou uo, o matou uo. A o outou fili, e le o ni matou fili, o outou lava fili. Ae aua le aumaia ia outou fili e taofi ai le mea e manuia ai matou. Po o fea e sau ai le fesoasoani, talia. O le ala foi lena o lea e tau fautua ai ia lau Matagaluega, faaoga le tou common sense.

Lau Afioga i le Fofoga Fetalai, o le faapuupuuga lena o lenei tamai mataupu ae o lea ua ou vaai atu ua ta le 12:00, ia manuia tele le Fono.

Tofa Lealailepule Rimoni Aiafi: Lau Afioga i le Fofoga o le Fono...

SUI FOFOGA FETALAI: Malie le sui usufono o lo o tulai mai se i... o lea ua tatou....

Tofa Lealailepule Rimoni Aiafi: Ioe, malie lava lau Afioga...

SUI FOFOGA FETALAI: Ua ou malamalama lelei i le mea lea e te tau aumaia...

Tofa Lealailepule Rimoni Aiafi: E tasi lava le mea e taua lea o le mataupu lea na laga e le Afioga i le Palemia...

SUI FOFOGA FETALAI: E aua le fai fili malie le... ia tuu atu la le avanoa.

Tofa Lealailepule Rimoni Aiafi: Leai, o nei, e moni lava lau tala lea la e silasila le Atua. O lea na tuu e uma loa ave lau feau faamanuia i si ou uso o nei e atoa ai le 55 tausaga o si ou uso. Ae o lea faafetai o lea ua faamanuia i ai le Toeaina. E le popole foi matou, manatua o le tama e toa-6 le fanau, toeitiiti lava tutusa ma Tuilaepa.

SUI FOFOGA FETALAI: O le mea lea sa ou... ua ou iloa lelei lava le mea lea ua e tulai mai ai o tatou lava e tasi.

Tofa Lealailepule Rimoni Aiafi: Ae faafetai ua maua sou avanoa e faamanuia atu lou aso fanau lau Afioga Matafeo, po o lau Afioga Malagamaalii o le matai Vaitele, o le a faasala Galumalemana i lana saunoaga ae ia manuia tele lou aso soifua i lenei aso. Alofa atu mo oe le uso, faafetai.

Tofa Namulauulu Sami Leota: Lau Afioga...

SUI FOFOGA FETALAI: E le o i ai lava se tala a Faleafa e fai atu i le mea lea. O le ala lena o lou fai atu o lea ou te malamalama i le mea lea, le mea lea e tau saunoa i ai, o le faatamalii, faafetai.

Tofa Namulauulu Sami Leota: Lau Afioga e tasi lava le mataupu lea.

SUI FOFOGA FETALAI: E i ai le lagona o lea e matau atu o lea e tele moli ia e mumu mai i sui usufono mamalu e fia saunoa. Peitai, ua manatu le Nofoa, o le a faaaoga lona common sense, e faamuta ai galuega a le Palemene i lenei aso ua ta le taimi e uma ai, e tatau lava ona ou savali i Tulafono e faafoe ai Tualumaga a le Fono Aoa.

O le mea la lea malie sui usufono, tapena lelei fesili ma mea uma mo le Aso Gafua pe a ave i ai lo outou soifua e tusa ma le finagalo paia o le Atua. E i ai lou talitonuga o lea ua taoto lo tatou sa i faaiuga o lenei aso, e faapena foi lenei vaiaso.

E manatu ai e fia molimoli atu le faamalo ma le faafetai i le paia maualuga o le Palemene, o outou lava o Tupu ma Ee o sui usufono na filifilia, o lupe

na faia mai i le fuifui, aua Samoa ma lana faigatonu ma lana Faigamalo i le Malae i Tiafau nei. Faafetai malo le tofa, sologa manuia ma see lelei Taulumaga o le Fono Aoaofaitulafono i lenei vaiaso, talu lo outou silasila faatamalii, talu lo outou finagalo e sii i le Atua mea uma. E pule le Atua i lo outou finagalo.

A lea ua iu manuia ai lenei vaiaso, ae a lenei aso? O le a ea se matou tala e fai? Faafetai tele. O mea uma ua o tatou faia, ia fai ma Viiga o Le Atua. Le tapuaiga a Samoa, ioe, e le sili le tai i le tapuai. O la outou tapuaiga, o le mamana o la outou tui mai o le mulipapaga ma feula mai le mulila, ia ua ae manuia ai faiva o lau Palemene, faafetai tele.

Le paia o le aufaigaluega galulue a le Atua ioe, o la outou tatalo, ua mana ai ma manuia ai mea uma i le Maota lenei. Ia faafetai tele.

Ia e fia momoli se faamalo ma le faafetai i a outou Afioga o Ofisa Sili o Pulega o Matagaluega ma Faalapotopotoga a le Malo talu mai le Aso Gafua o lea lava e solisoli mulivae, auai faatasi, nutimea faatasi ma le Faigamalo ia aua se manuia o a tatou atinae o lo o taumafai i ai. Maua la outou tofa, maua so outou finagalo, ia e pei ona i ai le tatou mafutaga i lenei vaiaso.

E fia momoli se faafetai i le Matagaluega o Leoleo aua le tausiga o le filemu, ia malu le Fonotaga a le atunuu. Lau Afioga i le Komesina, lau Afioga i le Minisita faafetai tele. E fia momoli foi se faafetai tele i le Matagaluega o le Soifua Maloloina o gafa pea i latou o lo o tutu i luma, ina ia maua pea le saogalemu o sui usufono uma, auai mai i le Fonotaga i Tiafau nei. Ia malo galulue, faamanuia le Atua.

Ia e faapea foi le Pulega o le Malosi Faaletise, matauina lava lo outou tu pea e sauniuni ma tapenapena ina ia sologa manuia Taulumaga o le Fonotaga a le Palemene i lenei vaiaso. E momoli atu le faamalo ma le faafetai ma faamanuia le Atua.

Lau Afioga i le Failautusi ma le Fono Aoaofaitulafono matou te le selu atu, o outou lava o le tao faafuavelo a le Palemene, aua ona tiute fai. Ia faamanuia le Atua i le galuega o lenei vaiaso.

Ia ae tatou te le i tolopo e tusa ai ma galuega o lenei vaiaso ma lenei aso, ou te tapa le sui usufono mamalu mo Samatau ma Falelatai, ia, leaga o oe e i ai ou tofiga, e te faaiuina le tatou Fonotaga i se tatalo.

Na tolopo Taulumaga a le Fono Aoaofaitulafono i le itula e 12:11 i le aoauli seia aulia le Aso Gafua, 22 Fepuari 2021 i le itula e 9:00 i le taeao.